







古樂苑卷第四十七

西吳 梅鼎祚 補正

東越 呂胤昌 校閱

襍歌謠辭

三國

蜀漢

諺孔明諺

襄陽耆舊傳曰黃彥承高爽開朗為沔南名士謂孔明曰聞君擇婦身有醜女

黃頭黑面才堪相配孔明許即載送之鄉里為之諺曰

莫學孔明擇婦正得阿承醜女

李鱗甲

江表傳曰諸葛亮表都尉李嚴少為郡吏用性深尅苟利其身鄉里為嚴諺曰

難可狎李鱗甲



諸葛諺

晉漢春秋曰諸葛亮卒楊儀整軍而出宣王不逼百姓諺曰

死諸葛走生仲達

何隨語

華陽國志曰何隨字季業蜀郡郫人也除安漢令蜀亡去官時巴土饑荒所在

無穀送吏行乏輒取道側民芋隨以綿繫其處使足所取直民視芋見綿在語曰聞何安漢清廉行過從者無糧必能爾耳持綿追還之終不受因爲語曰

安漢吏取糧令爲之償

蜀語

華陽國志曰巴西郡二主之世稱美荆楚先漢以來馮車騎范鎮南皆植斯鄉故曰

巴有將蜀有相

假鬼教

華陽國志曰先主薨後雍閭殺益州太守正昂更以蜀郡張裔爲太守閭假鬼

教曰云云按蜀書云張府君如瓠壺外雖澤而內實粗不足殺令送與吳似不當附語

張裔府君如瓠壺殺之不可送與吳

魏

歌

徐州歌

晉書曰王祥隱居廬江三十餘年不應州郡之命徐州刺史呂虔檄為別駕于

時寇盜克斥祥率勵兵士頻討破之州界清靜政化大行時人歌之按魏志呂虔文帝

時遷徐州刺史請琅瑯王祥為別駕

海沂之康實賴王祥邦國不空別駕之功

滎陽令歌

殷氏世傳曰殷褒為滎陽令廣築學館會集朋徒民知禮讓乃歌之二云

滎陽令有異政修立學校人易性令我子弟耻鬪訟

樂府

作訟爭

行者歌

選詩拾遺作魏時童謠歌云見五行志王子年拾遺記曰文帝所愛美人薛靈

芸常山人也年十五容貌絕世咸熙中文帝
選良家子女以入六宮常山太守習谷以千
金寶賂聘之以獻至京師帝以文車十乘迎
之逆側燒石葉之香未至數十里膏燭之光
相續不滅車徒咽路塵起蔽於星月又築土
爲臺基高三十丈列燭於臺下遠望如列星
之墜地又於大道之傍一里一銅
表高五尺以誌里數故行者歌曰

青槐夾道多塵埃
龍樓鳳闕望崔嵬
清風細雨襟香來

土上出金火照臺

此七字是妖辭也銅表誌道是土上

之義漢火德王魏土德上火伏而土興土
上出金是魏滅而晉興之兆晉以金王也

兜鈴曹子歌

晉書曰明帝太和中京師歌兜鈴
曹子其唱曰云云此詩妖也其後

曹爽見誅
曹氏遂廢

其奈汝曹何

謠
明帝景初中童謠宋書五行志曰魏明帝景初中童謠及宣王平遼東歸至

白屋當還鎮長安會帝篤疾急召之乃乘追鋒車東渡河終翦魏室如童謠之言也

阿公阿公駕馬車不意阿公東渡河阿公東還當奈何

東晉書作來

齊王嘉平中謠宋書五行志曰魏齊王嘉平中謠按朱虎者楚王彪小字也王

凌令狐愚聞此謠謀立彪事發凌等伏誅彪賜死

白馬素羈西南馳其誰乘者朱虎騎

謠言魏略護軍總統諸將任主武官選舉前後當此官者不能止貨賂故蔣濟為護軍時

有謠言

欲求牙門當得千匹百人督五百匹

諺

諺言

太祖為魏王中尉崔琰取表草視之與楊訓書曰省表事佳耳時乎時乎會當有變

時琰本意譏論者好譴呵而不尋情理也有白琰此書傲世怨謗者太祖怒曰諺言云云

會當有變時意指

不遜遂賜琰死

生女耳耳非佳語

夏侯語

魏書曰夏侯淵為將赴急疾常出敵不意故軍中語曰

典軍校尉夏侯淵三日五百六日一千

詩紀作六十千誤淵從太祖征

伐封傳

呂亭侯

軍中語

魏略曰太祖使盧洪趙達撫軍主刺舉軍中語曰

不畏曹公但畏盧洪曹公尚可趙達殺我

帳下語

江表傳曰典韋容貌魁傑名冠三軍其所持手戟長一尋軍中為之語曰

帳下壯士有典君手把雙戟八十斤

魏誌云曹公帳下有典君提一雙戟

八十斤

邢子昂語

魏志曰邢顗太祖辟爲冀州從事時人稱之

德行堂堂邢子昂

白鶴

王子年拾遺記曰曹洪與魏武帝所乘之馬名曰白鶴時人諺曰

憑空虛躍曹家白鶴

諺

傳子曰劉曄仕明皇帝能應變持兩端帝後得其情遂疏焉曄遂發狂憂死諺曰

巧詐不如拙誠

語

魏氏春秋宗室曹罔上書請廣建同姓褒異宗室撰合所聞聚論成敗引語曰

百足之蟲至死不僵

以扶之者衆也

鴻臚語

魏略曰韓宣字景然為大鴻臚始南陽曲阜韓暨以宿德在宣前為大鴻臚及

宣在官亦稱職故鴻臚中為之語曰

大鴻臚小鴻臚前後治行相曷如

州中語

魏略曰賈洪字叔業馮翊敬危材學最高故眾人為之語曰

州中曄曄賈叔業辨論洵洵敬文通

一作嚴苞字文通

京師語

魏書鄧颺字玄茂歷遷侍中尚書颺為人好貨前在內職許臧艾授以顯官艾

以父妾與颺故京師為之語曰

以官易富鄧玄茂

語

任叡別傳曰叡樂安博昌人夙智早成故鄉人為之語曰

蔣氏翁任氏童

楊阿若

魏志注曰楊阿若後名豐字伯陽少遊俠常以報仇解怨爲事故時人爲之號

三

東市相斫楊阿若西市相斫楊阿若

諺

魏武選令曰諺曰云云昔季闔在白馬有受金取婢之罪棄而弗問後以爲濟北相以其能故

失晨之雞思補更鳴

諺

曹植令曰諺云云夫相者文德昭將者武功烈

相門有相將門有將

諺

梁祚魏國統曰王昶字文舒戒子書引諺曰云云

如不知足則失所欲

救寒無若重裘。止謗莫如自脩。

諺

王朗貧窶
語曰諺曰

魯班雖巧不能爲乞丐者顏

謗書

魏略曰李豐字安國爲侍中僕射在臺閣
常多托疾時臺制滿百日當解祿豐未滿

百日蹙起已而復赴如是數歲及太傅宣王
久病曹爽攝政豐依違二公間故時人有謗

書曰

曹爽之勢熱如火太傅父子冷如漿李豐兄弟如遊光

其意以爲豐雖外示清淨
而內圖事機有似遊光

謗書

魏略曰丁謐外似疎濫而內明慧雖與何
晏鄧颺等同列而皆少之唯以聲勢屈於

曹爽爽亦敬之言無
不從故于時謗書云

臺中有三狗二狗嗥喋不可當一狗憑默作蛆囊謂三狗何

鄧丁也默者爽小字也意言三狗皆欲嚙人而謚尤蛆囊也魏志默作點蛆作瘟

管輅言

華陽國志曰先主進攻漢中至定軍黃忠奪登山魏夏侯淵搦戰忠與法正定

計斬淵先是神卜管輅曾言於操曰云云操至是服其言按此本非謠諺而近識且有韻

故附

三八縱橫黃猪遇虎定軍之南傷折一股

乃建安二十四年巳亥正

月定軍在沔縣南淵與操為弟兄猶手足也

吳

歌

王世容歌

吳錄曰王鍾字世容為武城令民服德化宿惡奔迸父老歌之鍾藝文類

聚作譚

譚

王世容政無雙省徭役盜賊空

彭子陽歌

吳錄曰彭循字子陽毗陵人建國二年海賊丁儀等萬人據吳太守秋君

聞循勇謀以守今循與儀相見陳說利害應時散去民歌之曰

時歲倉卒賊縱橫大戟强弩不可當賴遇賢令彭子陽

黃龍中童謠

周處風土記曰吳黃龍中童謠後孫權征公孫淵浮海乘船舶白也

行白者君追汝句驪馬

孫亮初童謠

晉書五行志曰孫亮初童謠按楊子閣者反語石子桐也鈎絡鈎帶

也及諸葛恪死果以蓆席裹身篋束其腰投之石柁後聽恪故吏收葬求之此柁云云

吁汝恪何若若蘆葦單衣篋鈎絡於何相求揚子閣

揚晉

書作常

孫亮初白鼃鳴童謠

晉書五行志曰吳孫亮初公安有白鼃鳴童謠按南

郡城可長生者有急易以逃也明年諸葛恪敗弟融鎮公安亦見襲融刮金印龜服之而

死鼃有鱗介甲兵之象也

白鼃鳴龜背平南郡城中可長生守死不去義無成

會稽謠

吳書吳主亮被廢為會稽王孫休即位三年會稽近謠言云云而亮宮人告亮

使巫禱祠有惡言黜為候官侯自殺

王亮當還為天子

建業謠

吳書孫休時張布與丁奉謀於會殺孫綝永安元年十二月丁卯建業中謠言

云云戊辰獵會綝入見殺

明會有變

孫皓初童謠

文選補遺作揚州歌晉書五行志曰吳孫皓初童謠按皓尋遷都武

昌民泝流供給咸怨毒焉按武昌記曰大帝築城江夏以程普為太守遂欲都鄂州改為

武昌郡其民謠曰寧飲建業水不食武昌魚寧歸建業死不向武昌居繇是徙都建業則

此又非孫皓初矣

寧飲建鄴水不食武昌魚寧還建業死不止武昌居

壽春童謠

江表傳曰初丹陽刁玄使蜀得司馬徽與劉廙論運命歷數事玄詐增其

文以誑國人曰黃旗紫蓋見於東南終有天下者荆揚之君乎又得國中降人言壽春下

有童謠云云孫皓聞之喜即載其母妻子及後宮數千人從牛渚陸道西上云青蓋入洛

陽以順天命

吳天子當上

孫皓天紀中童謠

晉書五行志曰吳孫皓天紀中童謠晉武帝聞之加王濬

龍驤將軍及征吳江西衆軍無過者而王濬先定秣陵羊祜別傳曰先時吳童謠云云祜聞之曰此必水軍有功但當思應其名者耳即表濬爲龍驤將軍濬小字阿童

阿童復阿童銜刀游渡江不畏岸上虎但畏水中龍

吳謠

吳志曰周瑜少精意於音樂唯三爵之後其有闕誤瑜必知之知之必顧故時人謠

云

曲有誤周郎顧

有一作復

廣陵諺

張勃吳錄曰陸稠字伯羸爲廣陵太守姦吏斂手廣陵諺曰

解結理煩我國陸君

時人語

高僧傳曰孫權已制江左而佛教未行有支謙者本月支人來遊漢境博覽經

籍莫不精究遍學異書通六國語其為人
細長黑瘦眼多白而睛黃時人爲之語曰

支郎眼中黃形驅雖細是智囊

異小兒言

晉書五行志曰孫休永安三年將守
質子羣聚嬉戲有異小兒忽來言曰

云云又曰我非人熒惑星也言畢上昇仰視
若曳一匹練有頃沒于寶曰後四年而蜀亡
六年而魏廢二十一年而吳平於是九服歸
晉魏與吳蜀並戰國三公鋤司馬如之謂也

三公鋤司馬如

題門語

世說新語曰賀邵會稽山陰人歷散騎
常侍出爲吳郡太守初不出門吳中諸

強族輕之乃
題府門云

會稽雞不能啼

賀聞故出行至門反顧索筆足之云於是至
諸屯邸檢校諸顧陸役使官兵及藏通亡悉

以事言上罪者甚衆陸抗時爲江陵都督故下請孫皓然後得釋

不可啼殺吳兒

孫皓時詩妖

晉書五行志曰孫皓遣使者祭石印山下妖祠使者因以丹書嚴口

云云皓聞之曰從大皇帝至朕四世太平之主非朕復誰恣虐踰甚尋以降亡近詩妖也

楚九州渚吳九州都揚州士作天子四世治太平矣

第四

終

建

古樂苑卷第四十八

西吳 梅鼎祚 補正

東越 呂胤昌 校閱

襍歌謠辭

晉諸國附

歌

東哲歌

晉書曰東哲陽平元城人太康中郡界大旱哲為邑人請雨三日而雨注眾為作歌

東先生通神明請天三日甘雨零我黍以育我稷以生

何以疇之報東長生

育一作萌

徐聖通歌

藝文列晉人中會稽典錄曰徐弘字聖通為汝陰令誅鉏姦桀道不拾遺民乃

歌之

徐聖通政無雙平刑罰姦宄空

醇酒歌

拾遺記曰張華爲九醞酒以三薇漬麴蘖出西羌麴出北胡胡中有指星麥四月火

星出來熟穫之蘖用水漬麥三夕而萌芽雞鳴而用之俗呼爲雞鳴麥釀酒醇美久含令人齒動若大醉不叫笑搖蕩令人肝腸消爛俗人謂爲消腸酒或云醇酒可爲長宵之樂閭里歌曰

寧得醇酒消腸不與日月爭光

應詹歌

晉書曰王澄惠帝末爲荊州牧假應詹督南平天門武陵三郡軍事天下大亂詹境

獨全百姓歌之

亂離旣普殆爲灰朽僥倖之運賴茲應后歲寒不凋孤境獨守拯我塗炭惠隆丘阜潤同江海恩猶父母

并州歌

見趙書樂府廣題曰晉汲桑清河貝丘人力能扛鼎殘忍少恩六月盛暑重裘累裯

使十餘人扇之忽不清涼便斬扇者并州大姓田蘭薄盛斬於平原士女慶賀奔走道路而歌

之

士爲將軍何可羞六月重茵被狐裘不識寒暑斷人頭

雄兒田蘭爲報讐中夜斬首謝弁州

狐一作豹

襄陽兒童歌

晉書曰山簡字季倫永嘉初爲南征將軍出鎮襄陽于時四方寇亂朝野

危懼簡優游卒歲惟酒是耽諸習氏者荆土豪族有佳園池簡每出嬉遊多之池上置酒輒醉名之曰高陽池時有兒童歌曰

山公出何許往至高陽池日夕倒載歸酩酊無所知時

時能騎馬倒着白接離舉鞭向葛彊何如弁州兒

彊家在弁

州簡愛將也

吳人歌

晉書曰鄧攸元帝時爲吳郡太守刑政清明百姓歡悅後稱疾去百姓數千人留牽

攸船不得進攸乃少停
夜中發去吳人歌之

統如打五鼓鷄鳴天欲曙鄧侯挽不留謝令推不去

豫州歌

晉書曰祖逖元帝時為豫州刺史躬自儉約督課農桑克已務施不畜資產子弟耕

耘負擔樵薪又收葬枯骨為之祭醕百姓感悅嘗置酒大會耆老中坐流涕曰吾等老矣更得父母死將何恨乃歌曰祖逖別傳作童謠附後

幸哉遺黎免俘虜三辰既朗遇慈父玄酒忘勞甘瓠脯

何以詠思歌且舞

幸哉遺民免豺虎三辰既朗遇慈父玄酒清醪甘瓠脯亦何報恩歌且舞

幸宣城歌

晉書陶汪咸康中為宣城中為宣城內史招隱逸廣學舍士民知嚮方者辟為掾史百姓歌之

人當勤學得主簿誰復為之陶明府

三明歌

中興書曰諸葛恢字道明避難過江與穎川荀道明閭陳留蔡道明謨俱有名譽號

曰中興三
明時人歌之曰

京都三明各有名蔡氏儒雅荀葛清

都一作師
晉書作語

庾公歌

二首晉書五行志曰庾亮初鎮武昌出至石頭百姓於岸上歌之後連徵不入及薨

於鎮以喪還都
葬皆如謠言

庾公上武昌翩翩如飛鳥庾公還揚州白馬牽流旒

庾公初上時翩翩如飛鳥庾公還揚州白馬牽流蘇一作

旒車

阿子聞歌

晉書五行志曰穆帝升平中童兒輩忽歌於道曰阿子聞曲終輒云云無幾而

帝崩太后哭之
曰阿子汝聞不

阿子汝聞不

廉歌

晉書五行志曰升平末俗間忽作廉歌有扈謙者聞之曰廉者臨也歌云云内外悉臨國

家其大諱乎少時而穆帝晏駕

白門廉宮庭廉

郝王歌

世說曰郝超王珣並以俊才為桓大司馬所眷珣為主簿超為記室參軍超為人多

鬚珣形狀短小時人為之歌曰

髯參軍短主簿能令公喜能令公怒

晉書作府中語

御路楊歌

晉書五行志曰晉海西公太和中民為此歌白者金行馬者國族紫為奪正之色明以紫間朱也海西公尋廢三子非海西公之子縊以馬韁歟之明日南方獻甘露

青青御路楊白馬紫游韁汝非皇太子那得甘露漿

鳳皇歌

晉書五行志曰晉海西公生皇子百姓歌之其歌甚美其音甚微海西公不男使左

右向龍與內侍接生子以為巳子
一言桓溫將廢海西使為此歌

鳳皇生一雛天下莫不喜本言是馬駒今定成龍子

黃曇歌

晉書曰桓石民為荊州鎮上明百姓忽歌曰黃曇子曲終又曰云云頃之而桓石民

死王忱為荊州黃曇子乃是王忱字也忱小字佛大是大佛來上明也

黃曇英揚州大佛來上明

歷陽歌

晉書五行志曰庾楷鎮歷陽百姓歌之後楷南奔桓玄為玄所殺

重羅黎重羅黎使君南上無還時

樊氏陂歌

樊氏陂使氏取之時人歌曰

陂汪汪下田良樊子失業庾公昌

桓玄時小兒歌

吳均續齊諧記曰桓玄篡位後朱雀門中忽見兩小兒通身如墨相

和作籠歌云云路邊小兒從而和之者數十人
聲甚哀楚日既夕二小兒入建康縣至閤下遂
成雙漆鼓槌明年春而桓敗車無軸倚孤木桓
字也荊州送玄首用敗籠茵包之又芒繩束縛
其歿沈諸江中
悉如所歌焉

芒籠茵繩縛腹車無軸倚孤木

從者歌

續安帝紀曰司馬休之兄尚為桓玄所敗
休之奔淮泗頗得彼之人心從者為之歌

可憐司馬公作性甚溫良憶昔水邊戲使我不能忘

懊懷歌

晉書五行志曰安帝隆安中百姓忽作懊
懷之歌其曲曰云云尋而桓玄篡位義旗

以三月二日埽定京都誅之玄之宮女及逆黨
之家子女妓妾悉為軍賞東及歐越北流淮泗
皆人有所獲故言時則
草可結事則女可擷也

草生可攬結女兒可攬擷

歌三首

晉書本傳曰嘉死之日人有壟上見之其所造三章歌識事過皆驗金陵志曰初王

子年著識至安帝果為劉氏所代

王嘉

帝諱昌明運當極特申一期延其息諸馬渡江百年中

當值卯金折其鋒

欲知其姓草肅肅穀中最細低頭熟鱗身甲體永興福

南史曰齊太祖高皇帝諱道成姓蕭氏未受命時王子年作此歌按穀中精細者稻也即道也熟猶成也

金刀利刃齊刈之

金刀劉字刈猶剪也

涼州大馬歌

晉書曰張軌永寧初為涼州刺史王彌寇洛陽軌遣北宮屯張纂馬魴陰

濬等率州軍擊破之又敗劉聰于河東京師歌之曰

涼州大馬橫行天下涼州鴟苕寇賊消鴟苕翩翩怖殺

人

麴游歌

晉紀曰麴允金城人也與游氏世為豪族西州為之歌曰

麴與游牛羊不數頭南開朱門北望青樓

晉書作語

隴上歌

晉書載記曰劉曜圍陳安于隴城安敗南走陝中曜使將軍平先丘中伯率勁騎追

安安與壯士十餘騎於陝中格戰安左手奮七尺大刀右手執丈八蛇矛近交則刀矛俱發輒害五六遠則雙帶鞭服左右馳射而走平先亦壯健絕人與安搏戰三交奪其蛇矛而退遂追斬于澗曲安善於撫綏吉凶夷險與眾同之及其死隴上為之歌曜聞而嘉傷命樂府歌之

隴上壯士有陳安軀幹雖小腹中寬愛養壯士同心肝

驍驄父馬鐵鍔鞍七尺大刀奮如湍丈八蛇矛左右盤

十盪十決無當前戰始三交失蛇矛棄我驍驄竄巖幽

爲我外援而懸頭西流之水東流河一去不還奈子何

隴上健兒曰陳安軀幹雖小腹中寬愛養壯士同心

肝騾驄駿馬鐵鍔鞍七尺大刀配齊鐐丈八蛇矛左

右盤十盪十決無當前百騎俱出如雲浮追者千萬

騎悠悠戰始三交失蛇矛十騎俱盪九騎留棄我騾

驄攀巖幽天非降雨追者休阿阿嗚呼奈子何嗚呼

阿阿奈子何趙書曰劉曜討陳安於隴城安下小將多堅戍不下城內得安死力謠曰云云

與前小異

關隴歌

拾遺作苻秦時童謠晉書曰苻堅時關隴清宴百姓豐樂自長安至於諸州皆夾路

樹槐柳二十里一亭四十里一驛旅行者取給於途工商賈販於道百姓歌之崔鴻前秦錄曰

王猛化洽六州人移風變百姓歌之曰

長安大街夾樹楊槐下走朱輪上有鸞栖英彥雲集誨

我萌黎

苻秦鳳皇歌

崔鴻前秦錄曰永興三年九月鳳皇翔于東郊民因歌之

鳳皇于飛其羽翼翼淵哉聖后饗齡萬億

一作翊我聖后其齡萬億

苻堅時長安歌

晉書載記曰苻堅既滅燕慕容冲姊偽清河公主年十四有殊色堅

納之寵冠後庭冲年十二亦有龍陽之姿堅又幸之姊弟專寵宮人莫進長安歌之咸懼為亂

王猛切諫堅乃出冲後竟為冲所敗

一雌復一雄雙飛入紫宮

此本漢紫宮諺

索稜歌

崔鴻十六國春秋前秦錄曰索稜字孟則檄煌人好學博聞姚萇甚重之委以機密

文章詔檄皆稜之文也後為平原
太守以德化民民畏而愛之歌曰

懿矣明守庶績允釐剖符作宰實獲我思

謠

泰始中謠

晉書曰泰始中人為賈充等謠言亾魏而成晉也

賈裴王亂紀綱王裴賈濟天下

賈充裴秀王沈

南土謠

晉書曰杜預都督荊州舊水道惟沔漢達江陵千數百里無通路又巴丘湖沅湘之

會表裏山川實為險固荆蠻之所恃也預乃開揚口起夏口水道洪洞達巴陵千餘里內瀉長

江之險外通零桂之漕南土美而謠曰

後世無叛由杜翁孰識智名與勇功

軍中謠

晉書曰杜預遣周旨伍巢等伏兵樂鄉城外孫歆遣軍出拒旨等發伏兵隨歆軍而

入直至帳下虜歆而還故軍中為之謠曰

以計代戰一當萬

閣道謠

晉書曰蒲岳才名冠世為衆所疾泰始十年出為河陽令而鬱鬱不得志時尚書僕射山濤領吏部王濟裴楷等並為帝所親遇岳內非之乃題閣道為謠

閣道東有大牛王濟鞅裴楷鞅和嶠刺促不得休

閣東有大牛和嶠鞅裴楷鞅王濟剔剔不得休

世說曰山

公以器重朝望年踰七十猶知管時任貴勝年少若和裴王之徒並共宗詠有署閣柱云云或云蒲尼作之竹林七賢論曰濤之處選非望路絕故貽是言

蜀民謠

許遜晉武帝太康初為蜀郡旌陽縣令屬歲大疫死者十七八遜以所授神方拯治

之符呪所及登時而愈蜀民為之謠曰

人無盜竊吏無奸欺我君活人病無能為

童謠

晉書曰石苞既定壽春以威惠服物淮南監軍王環輕苞素微又聞童謠因是密表苞與

吳人
交通

宮中大馬幾作驢大石壓之不得舒

武帝平吳後童謠

三首宋書五行志曰武帝太康後江南童謠于時吳人皆謂在

孫氏子孫故竊發為亂者相繼按橫目者四字自吳亡至晉元帝興幾四十年皆如童謠之言元帝懦弱而少斷局縮肉直斤之也

局縮肉數橫目中國當敗吳當復

宮門柱且莫朽吳當復在三十年後

雞鳴不拊翼吳復不用力

惠帝時兒童謠

襄陽耆舊傳曰晉惠帝即位兒童謠曰云云又河內溫縣有人如狂

造書曰云云楊濟以問蒯欽欽垂泣曰皇太后諱季蘭兩火武皇帝諱炎字也此言武皇崩而太皇失尊羅大禍辱終始不以道不得附山陵乃歸於非所也及太后之見滅葬於街郵亭皆如其言晉書志曰楊駿居內府以戟爲衛死時又爲戟所害傷楊后被廢賈后絕其膳八日而崩崩葬街郵亭百姓哀之也

兩火沒地哀哉秋蘭歸形街郵終爲人歎

晉書並作溫縣狂書

溫縣狂書

光光文長以戟爲墻毒藥雖行戟還自傷

以一作大雖一作即戟一

刃作

惠帝永熙中童謠

晉書五行志曰惠帝永熙中童謠時楊駿專權楚王用事故信

荆筆楊版二人不誅則君臣禮悖故云幾作驢也

二月末三月初荆筆楊版行詔書宮中大馬幾作驢

大

作人王隱晉書云二月盡三月初桑生

雪柳葉舒下同

惠帝元康中京洛童謠

二首晉書五行志曰惠帝元康中京洛童謠南風賈

后字也白晉行也沙門太子小字也魯賈謐國也言賈后將與謐為亂以危太子而趙王因釁咀嚼豪賢以成篡奪不得其死之應也

南風起兮吹白沙遙望魯國何嵯峨千歲髑髏生齒牙

一無
兮字

南風烈烈吹黃沙遙望魯國鬱嵯峨前至三月滅汝

家

賈后傳有此謠與五行志所載不同其後賈謐既誅賈后尋亦廢死宋書五行志是時愍懷頗失衆

望卒以廢黜
不得其死焉

城東馬子莫嚨啍比至來年纏汝髮

東宮馬子莫聾空前至臘月纏汝髮

愍懷太子傳紀此謠

惠帝大安中童謠

晉書五行志曰晉惠帝大安中童謠其後中原大亂宗藩多絕

唯瑯琊汝南西陽南頓彭城同至江東而元帝嗣統矣

五馬浮渡江一馬化為龍

浮宋書作游

元康中童謠

晉書五行志曰元康中天下商農通著大鄴日時童謠曰云云及趙王倫篡位其月

實眇焉

屠蘇鄴日覆兩耳當見瞎兒作天子

元康中洛中童謠

晉書五行志曰晉元康中趙王倫既篡洛中有童謠數月而齊

王成都河間義兵同會誅倫按成都西藩而在鄴故曰虎從北來齊東藩而在許故曰龍從南

來河間水區而在關中故曰水從西來齊留輔政居于宮西有無君之心故曰登城看也

虎從北來鼻頭汗龍從南來登城看水從西來河灌灌

著布謠

晉書曰齊王冏字景治趙王倫篡位冏起義兵誅之拜太司馬加九錫政皆決之而

恣用羣小不復朝覲時人謠曰云云遂為長沙王所誅

著布袒腹為齊持服

洛下謠

晉書曰長沙王又武帝第六子也三王舉義又率國應之後見冏專權奉天子攻冏

斬之河間王顥與成都王穎同伐京師詔以又為大都督以距顥相持數月東海王越慮事不濟潛收又送金墉城密告張方方遣兵就金墉收又炙殺之初又執權之始洛下謠曰云云以正月二十五日廢後二日死如謠言

草木萌芽殺長沙

惠帝時洛陽童謠

晉書曰惠帝時洛陽童謠明年而胡賊石勒劉羽反

鄴中女子莫千妖前至三月抱胡腰

蜀郡童謠

元康三年正月歟一夜有火光地仍震童謠曰

郫城堅益底穿郫中細子李特細

又

江橋頭闕下市成都北門十八字

又

及羅尚在巴郡也又曰尚梁州刺史

巴郡葛當下美巴郡

字疑有誤

又

皮素之西上也又曰素益州刺史

有客有客來侵門陌其氣欲索

蜀人謠

二首晉書曰羅尚字敬之一名仲太康末為荊州刺史及趙廞反于蜀乃假尚節為

平西將軍益州刺史尚性貪少斷蜀人謠曰

尚之所愛非邪則佞尚之所憎非忠則正富擬魯衛家

成市里貪如豺狼無復極已

晉書作蜀人言曰

蜀賊尚可羅尚殺我

懷帝永嘉初童謠

晉書五行志曰司馬越還洛時童謠也按列傳越既與荀晞構

怨尋詔越為丞相領兖州牧督兖豫司冀幽并六州越辭丞相不受自許遷于鄆城移屯濮陽又遷于滎陽後自滎陽還洛懷帝紀曰永嘉三年三月丁巳東海王越歸京師是也

洛中大鼠長尺二若不早去天狗至

天宋書作大

同前

晉書五行志曰荀晞將破汲桑時有此謠司馬越由是惡晞奪其兖州隙難遂構焉按列

傳東海孝獻王越字元超懷帝永嘉初出鎮許昌自許昌率荀晞及冀州刺史丁邵討汲桑破之越還于許長史潘滔說之曰兖州天下樞要公宜自牧乃轉荀晞為青州刺史由是與晞有隙

元超兄弟大洛度上桑打樵為荀作

王彭祖謠

晉書曰王浚永嘉中進大司馬侍中大都督督幽冀諸軍事會京洛傾覆浚大

樹威令專權橫恣時童謠曰

幽州城門似藏戶中有伏尸王彭祖有狐踞府門翟雉入聽事

束郎謠

見王浚傳束嵩浚之子婿浚聞責嵩而不能罪之也

十囊五囊入夷郎

愍帝初童謠

晉書五行志曰愍帝初童謠至建興四年帝降劉曜在城東豆田壁中

天子何在豆田中

一作天子在何許近在豆田中王浚在幽州以豆有藿殺隱十霍原

建興中江南謠

晉書五行志曰建興中江南謠歌按白者晉行坑器有口屬瓮瓦瓮

質剛亦金之類也。司如白坑破者言二都傾覆王室大壞也。合集持作甌者元帝鳩集遺餘以主社稷未能尅復中原但偏王江南故其喻也。及石頭之事六軍大潰兵人抄掠京邑爰及二宮其後三年錢鳳復攻京邑阻水而守相持月餘日焚燒城邑井堙木刊矣鳳等敗退沈充將其黨還吳興官軍踵之蹈藉郡縣充父子授首黨與誅者以百數所謂揚州破換敗吳興覆甌甌甌甌甌瓦器又小於甌也

司如白坑破合集持作甌揚州破換敗吳興覆甌甌

呼

宏反坑宋書作防甌音武甌音部甌盧斗反

童謠

晉書曰溫嶠滅王敦先是童謠云云以為賊如韭柳尋得復生也

剪韭剪韭斷楊柳河東小子令我與子

明帝太寧初童謠

晉書五行志曰明帝太寧初童謠及明帝崩成帝幼為蘇峻所

逼遷于石頭御膳不足此大馬死小馬餓也高山峻也言峻尋灰石峻弟蘇石也峻灰後石據石頭尋為諸公所破是亦山崩石破之應也

惻惻力放馬山側大馬灰小馬餓高山崩石自破

成帝末童謠

晉書五行志曰成帝之末童謠少日而宮車晏駕

磕磕何隆隆駕車入梓宮

咸康二年童謠

晉書五行志曰咸康二年十一月河

麥入土殺石虎

晉起居注作麥如土虎晉書作武

謠言後如其言

吳中童謠

宋書五行志曰晉庾義在吳郡時吳中童謠無幾而庾義王洽相繼亡按晉史

穆帝時庾義為吳興內史王洽為吳郡內史徵拜領軍後皆卒於官義疑即義也

寧食下湖荇不食湖上蓴庾吳沒命喪復殺王領軍

哀帝隆和初童謠

晉書五行志曰哀帝隆和初童謠朝廷聞而惡之改年曰興寧

民復歌曰云云哀帝尋崩升平五年而穆帝崩不滿斗不至十年也

升平不滿斗隆和那得久桓公入石頭陛下徒跣走

雖復改興寧亦復無聊生

太和末童謠

晉書五行志曰太和末童謠及海西公被廢百姓耕其門以種小麥

犁牛耕御路白門種小麥

京口民間謠

二首晉書五行志曰王恭在京口民間忽有此謠按黃字上恭字頭也小

字恭字下也
尋如謠言

黃頭小兒欲作賊阿公在城下指縛得

黃頭小人欲作亂賴得金刀作蕃扞

京口謠

晉書五行志曰王恭鎮京口誅王國寶百姓為此謠按昔年食白飯言得志也今年

食麥麪麥麪麤穢其精已去明將敗也天公將加譴謫而誅之也捻嚨喉氣不通死之祥也敗復敗丁寧之辭也恭尋死京都人行咳疾而喉並喝焉

昔年食白飯今年食麥麪天公誅謫汝教汝捻嚨喉
喉喝復喝京口敗復敗

孝武帝太元末京口謠

晉書五行志曰孝武帝太元末京口謠尋土恭起兵

誅王國寶旋為劉牢之所敗故言拉颯棲也

黃雌雞莫作雄父啼一旦去毛衣衣被拉颯棲

荊州童謠

晉書五行志曰殷仲堪在荊州時童謠未幾而仲堪敗桓玄遂有荊州

芒籠目繩縛腹殷當敗桓當復

桓玄時小兒歌首二句同

安帝元興初童謠

宋書五行志曰晉桓玄既篡有此童謠及玄敗走至江陵五月

中誅如其期焉安帝紀桓玄篡位在安帝元興二年十二月也

草生及馬腹鳥啄桓玄目

民謠

志曰時又有民謠云征鍾至穢之服桓四體之下稱玄自下居上猶征鍾之廁歌謠下體

之詠民口也而云落地墜地之祥迸走之言其驗明矣

征鍾落地桓迸走

安帝元興中童謠

宋書五行志曰晉安帝元興中桓玄既得志而有童謠及玄敗

走諸桓悉誅焉郎
君司馬元顯也

長干巷巷長干今年殺郎君明年斬諸桓
此歌亦見晉書桓玄傳明

字作後

司馬元顯時民謠
二齊宋書五行志曰司馬元顯時民謠詩此詩云襄陽道人竺

曇林所作多所道行於世孟顗釋之曰十一口者玄字象也木亘桓也桓氏當悉走入關洛故云浩浩鄉也金刀劉也倡義諸公多姓劉媿媿美盛貌也

當有十一口當為兵所傷木亘當北度走入浩浩鄉

金刀既以刻媿媿金城中

安帝義熙初童謠
晉書五行志曰安帝義熙初童謠時官養盧龍寵以金紫奉以

名州養之已極而龍不能懷我好育舉兵內伐遂成讐敵也及敗斬伐其黨如草木之成積焉

按列傳盧循小字元龍元興二年寇廣州逐刺史吳隱之攝州事號平南將軍安帝乃假循征虜將軍廣州刺史義熙中劉裕破循于豫章循走交州爲刺史杜慧度所殺

官家養蘆化成荻蘆生不止自成積

安帝義熙初謠

二首晉書五行志曰盧龍據有廣州民間有謠云云後擁上流數州

之地內逼京輦應天半之言時復有謠言云云龍後果敗不得入石頭

蘆生漫漫竟天半

蘆橙橙逐水流東風忽如起那得人石頭

永嘉中長安謠

晉書曰張寔軌之子也軌卒授寔涼州刺史進大都督劉曜逼遷天

子寔遣太府司馬韓璞東赴國難璞次南安諸羌斷軍路寔擊破之斬級數千時焦崧陳安寇隴右東與劉曜相持雍秦之人死者十八九初永嘉中長安語曰云云至是驗矣

秦川中血沒腕唯有涼州倚柱觀

腕一作腕觀一作看

西土謠

晉書曰張茂寔之弟太興三年寔既遇害州人推茂平西將軍涼州牧涼州大姓賈

慕寔之妻弟也勢傾西土先是謠曰云云茂以爲信誘而殺之於是豪右屏迹威行涼域

手莫頭圖涼州

姑臧謠

晉書曰張駿寔之子茂卒駿嗣位大都督大將軍涼州牧西平公駿之立也姑臧謠

曰云云至是而收復河南之地

鴻從南來雀不驚誰謂孤雛尾翅生高舉六翮鳳皇鳴

張冲謠

崔鴻前涼錄曰張冲字長思燉煌人家則巨萬施之鄉閭時人爲之謠曰

推財不疑張長思

龐世謠

趙書曰燕人龐世爲光祿勳奏案豪強苛尅人物咸懼疾之及卒門無弔客時人爲

之謠
曰

龐家之巷車馬鱗鱗泥丸之日無弔賓弔賓不來何所

因由性苛尅寡所親

張樓謠

崔鴻後趙錄曰張樓爲臨水長嚴政酷刑殘忍無惠人謠之曰

陽平張樓頭如箱見人切齒劇虎狼

洪水謠

亦見崔鴻前秦錄晉書曰苻洪字廣世畧陽臨渭氏人也先是隴右大雨百姓苦之

謠曰云云故因名洪自稱大單于三秦王死僞謚惠武帝

雨若不止洪水必起

苻生時長安謠

二首晉書曰苻生洪之孫嗣父健位僭稱帝初生夢大魚食蒲又長

安謠曰云云東海苻堅封也時爲龍驤將軍第在洛門之東生不知是堅以謠言之故誅其侍

中魚遵及其子孫時又謠曰云云於是悉壞空城以禳之

東海大魚化為龍男便為王女為公問在何所洛門東

百里望空城鬱鬱何青青瞎兒不知法仰不見天星生闕

目一

苻堅時長安謠

晉書載記曰苻堅時長安有此謠堅以鳳皇非梧桐不棲非竹實不

食乃植桐竹數十萬株于阿房城以待之沖小字鳳皇至是終為堅賊入止阿房城焉

鳳皇鳳皇止阿房

苻堅時長安謠

晉書曰秦之末亂也長安謠曰云云秦人呼鮮卑為白虜慕容垂之

起于關東歲在癸未

長鞘馬鞭擊左股太歲南行當復虜

宿收一作避

苻堅初童謠

晉書五行志及堅敗於淝水為姚萇所殺在偽位凡三十年

阿堅連牽三十年後若欲敗時當在江湖邊

傳作江淮間

苻堅時童謠

晉書載記曰苻堅疆盛之時國有童謠云云堅聞而惡之每征伐戒軍候

云地有名新城者避之後因壽陽之敗其國大亂竟歿於新城佛寺

河水清復清苻詔歿新城

復一作且秦人稱其君曰詔

鮮卑謠

晉書五行志曰時復有謠歌云識者以為魚羊鮮也田斗卑也堅自號秦言滅之者

鮮卑矣其羣臣諫堅令盡誅鮮卑堅不從及淮南初為慕容中所攻又為姚萇所殺身死國滅

鮮卑田斗當滅秦

國中謠

晉書恒豁聞苻堅國中謠有子二十人皆名石應之及堅敗淝水謝石為都督

誰謂爾堅石打碎

謠言

魏書苻堅南伐至項城弟陽平公融攻壽春克之馳使白堅宜速進軍堅捨大軍於項城

兼道赴之遂大敗單騎遁還淮北初謠言曰云云羣臣勸堅序項為六軍聲鎮堅不從

堅不出項

將謠

魏書姚萇與慕容冲合攻苻堅於長安先是謠曰云云堅大信之至五將山姚萇執而縊

殺之

堅入五將山萇得

朔馬謠

晉書苻堅故將呂光僭即三河王位光徙西海郡人於諸郡謠曰云云復徙之西河

朔馬心何悲念舊中心勞燕雀何徘徊意欲還故巢

關東謠

晉書初關東謠曰云云缺慕容垂之本名與苻不相持經年百姓死幾絕

幽州缺生當滅若不滅百姓絕

燕童謠

晉書曰慕容熙為政暴虐其將馮跋張興皆坐事奔亡結盟推慕容雲為主因熙出

城閉門距守熙夜至龍城攻北門不尅為雲所執弑之時義熙二年也初童謠曰云云藁字上有草下有禾兩頭然則禾草俱盡而成高字雲父名拔小字秃頭三子而雲季也熙竟為雲所滅

一束藁兩頭然秃頭小兒來滅燕

大風謠

晉書載記曰慕容寶嗣位以慕容德為都督冀交六州諸軍事鎮鄴會魏師入中山

寶出奔于薊時有謠曰云云於是德之羣臣勸德潛號稱元

大風蓬勃揚塵埃八井三刀卒起來四海鼎沸中山頽

惟有德人據三臺

王公語

王祥別傳曰晉受禪時廊廟之士莫不歡容而祥色不加怡時人為之語曰

王公恨恨有送故之情也

裴秀語

虞預晉書曰秀字季彥河東聞喜人父潛魏太常秀有風操入歲能著文叔父徽有

聲名秀年十餘歲有賓客詣

徽出則過秀時人爲之語曰

後進領袖有裴秀

進一作來

石仲容

晉書曰石苞字仲容渤海南皮人也雅曠有知局容儀偉麗故時人爲之語曰

石仲容姣無雙

渤海

晉書曰歐陽建字堅石世爲冀方碩族雅有理想才藻美贍擅名北州人爲之語曰

渤海赫赫歐陽堅石

劉功曹

王隱晉書曰劉毅字仲雄僑居平陽太守杜恕逼迫舉毅爲功曹月餘日沙汰郡吏

百餘人三魏稱焉爲之語曰

但聞劉功曹不聞杜府君

諺

晉書陳留相樂安孫尹表曰劉毅前為司隸直法不撓當朝之臣多所按劾諺曰

受堯之誅不能稱堯

語

晉書劉頌字子雅廣陵人漢廣陵厲王胥之後也世為名族同郡有雷蔣穀魯四姓皆出其下

時人為之語曰

雷蔣穀魯劉最為祖

崔左丞語

晉書曰崔洪字伯良博陵安平人以清厲顯名武帝世為御史治書朝廷憚之

尋為尚書左丞時人為之語曰

叢生棘刺來自博陵在南為鷁在北為鷹

舊作歌

諺

晉書元康之後魯褒傷時貪鄙乃著錢神論引諺曰

錢無耳可聞使

成公綏亦有錢神論引
諺曰錢無耳可使鬼

貂不足

晉書曰趙王倫僭位諸黨皆登卿相並列
大封其餘同謀者咸超階越序不可勝紀

至於奴卒廝役亦加爵位每
朝會貂蟬盈坐時人諺曰

貂不足狗尾續

四部司馬

魏畧曰成都王穎伐長沙王又募免奴
為軍自稱四部司馬市郭人素謬語奴

為尚故
里語曰

三部司馬階下兵四部司馬尚長明欲知太平須石鼈

鳴

江應元

晉書曰江統字應元陳留圉人
也靜默有遠志時人為之語曰

嶷然稀言江應元

二王

晉書羊祜傳曰王衍嘗詣祜陳事辭甚俊辨祜不然之衍拂衣而起祜顧謂賓客曰王夷甫方以盛名處大位然敗俗傷化必此人也步

聞之役祜以軍法將斬王戎故戎衍並憾之每

言論多毀祜時人爲之語曰

二王當國羊公無德

衛玠

晉書曰瑯琊王澄有高名少所推服每聞衛玠言輒歎息絕倒故時人爲之語曰

衛玠談道平子絕倒

玠別傳前後三聞爲之三倒時人語曰衛君談道平子三倒

慶孫越石

晉書曰劉輿字慶孫雋朗有才局與弟琨名著當時京都爲之語曰

洛中奕奕慶孫越石

越石琨字

洛中諺

二首

洛中雅雅有三嘏

世說曰劉粹字純嘏宏字終嘏漢字冲嘏是親兄弟王安豐甥並是王安

豐女婿宏

真長祖也

洛中錚錚馮惠卿

惠卿名蓀是播子蓀與邢喬俱司徒李胤外孫及胤子順並知名時稱馮

才清李才

明純粹邢

洛中英英荀道明

晉書曰荀闓字道明有名稱京都為之語英英晉中興書作奕奕

王與馬

晉書曰元帝以王敦為揚州刺史加廣武將軍尋進左將軍都督征討諸軍事假節

帝初鎮江東威名未著敦與從弟導同心翼戴以隆中興時人為之語曰

王與馬共天下

幼輿語

晉書列傳曰謝鯤字幼輿通簡有高識任達不拘鄰家高氏女有美色鯤嘗挑之女

投梭折其兩齒時人為之語曰云云鯤聞之傲然長嘯曰猶不廢我嘯歌

任達不已幼輿折齒

郝王語

晉書曰王坦之字文度弱冠與郝超俱有重名時人爲之語曰云云嘉賓超小字也

盛德絕倫郝嘉賓江東獨步王文度

一作揚州獨步王文度後來出人郝嘉賓

太才繁繁謝家安江東獨步王文度盛德日新郝嘉賓

王羊語

沈約云羊敬元九長隸書子敬之後可以獨步時人語曰敬元羊欣字

買羊得羊不失所望

王僧珍

晉書曰王珉字季琰少有才藝善行書與兄珣並有名聲出珣右故時人爲之語曰

法護非不佳僧珍難爲兄

法護珣小字僧珍珉小字

殷往嗣

殷典通語曰殷禮字往嗣七歲就官學書在師未嘗戲弄行在舟車手不釋卷從曲

阿往返遂不知隄瀆廣狹及行旅喧鬧時人語曰

奇才強記殷往嗣

諺

晉書涼從事中郎張顯上疏諫後主欲引諺曰云云今狐上南門亦災之大也又狐者胡也天意若曰將有胡人居於此城南面而居者也

野獸人家主人將去

五龍一門

崔鴻前涼錄曰辛攀字懷遠隴西狄道人父夔尚書郎兄鑒曠弟實迅皆以才識知名秦雍爲之語曰

五龍一門金友玉昆

長安語

魏書初堅之未亂也關中土然無火而煙氣大起方數十里月餘不滅堅每臨聽訟

觀令民有怨者舉煙於城北觀而錄之長安爲之語曰

欲得必存當舉煙

二梁

崔鴻前秦錄曰梁謹字伯言博學有雋才與弟熙俱以文藻清麗見重一時人爲之語曰

關東堂堂一市兩房未若一梁瓌文綺章

苻雅語

秦書曰尚書令苻雅爲人樂施乞人填門嘗曰天下物何常吾今日富後日貧耳忽

一日不施則意不泰時人爲之語曰

不爲權異富寧作苻雅貧

五樓

晉書載記曰慕容越時公孫五樓爲侍中尚書專總朝政王公內外無不憚之尚書都令史王儼諂事五樓遷尚書郎出爲濟南太守入爲尚書左丞時人爲之語曰

欲得侯事五樓

太保語

崔洪蜀李雄錄曰雄異母兄始字伯敬爲太保善撫士衆衆多歸之時人爲之語曰

欲養老屬太保

書版語

蜀書咸熙二年夏巴郡文立從洛陽還蜀見譙周周語次因書版示立曰云云典午

者謂司馬也月酉者謂八月也至八月而文王果崩

典午忽兮月酉沒兮

識

晉書初元明世郭璞為識曰云云謂成帝有子而以國祚傳弟

君非無嗣兄弟代禪

又

有人姓李兒專征戰譬如車軸脫在一面

兒者子也李去子木存車

去軸為亘合成桓字也

又

爾來爾來河內大縣爾來謂自爾已來為元始

溫字元子也故

河內大縣溫也成康既崩桓氏始大故連言之

又

賴子之夢延我國祚痛子之隕皇運其暮

二子者元子道子也溫志

在篡奪事未成而死幸之也會稽王世子雖首亂晉國而其死亦晉哀之由也故云痛也

父老書

魏書世祖以沮遜牧健在涼州雖稱蕃致貢而內多乖戾於是親征城敗釋之初太

延城中有一父老投書於敦煌城東門忽然不見其書一紙八字文曰云云又於震電之所得

石丹書曰云云牧

健立果七年而滅

涼王三十年若七年

河西河西三十年破帶石樂七年

帶石山名在姑臧南山祀傍

玉版文

晉書慕容儁以永和八年僭即皇帝位初石季龍使人探策於華山得玉版文云云

及此燕人咸以爲儁之應也

歲在申酉不絕如綫歲在壬子真人乃見

識文

晉書姚興太史令高魯遣其甥王景暉送玉璽一紐并圖識秘文與慕容德羣臣因勸德

即尊號

有德者昌無德者亡德受天命柔而復剛

譙周識

魏書賓人李特與弟流據蜀自稱大都督特少子雄僭稱帝傳至勢為晉桓溫所滅

先是譙周云我死後三十年當有異人入蜀由之而亡蜀亡之歲去周亡三十二年周又著識

曰云云卒如其言

廣漢城北有大賊曰流曰特攻難得歲在亥宮自相尅

時人語

高僧傳曰釋道溫姓皇甫安定朝那人高士謚之後也年十六入廬山依遠公受學

大明中勅為都邑僧主累當講任稟位之賓填委相屬精勤導物數感神異帝悅之賜錢五十

萬時人爲之語曰 按大明
是宋孝武帝詩紀附晉疑悞

帝王傾財溫公率則上天懷感神靈降德

時人語

又曰釋慧靜姓王東阿人少游學伊洛之間晚歷徐兗容甚黑而識悟清遠時洛中有少門道經亦解邁當世與靜齊名而耳甚長大故時人語曰

洛下長大耳東阿黑如墨有問無不酬有酬無不答

詩紀

附晉

古樂苑卷第四十八

終





